

# Il siemi da la regina nauscha

Dudesch virtids per l'uman da noss temp

DA GUIU SOBIELA-CAANITZ

■ **Siemis fan part da nossa vita. Nus empruvain da viver a moda raziunala, ma noss subconscious n'accepta betg adina quai e rebellescha mintgatant cun in siemi che para absurd, irraziunal u schizunt snuaivel.** Il dramaturg franzos Jean Racine (1639–1699), en sia tragedia «Athalie», mussa ina regina nauscha, tschorventada dal regl da pussanza, che na vul acceptar in siemi profetic:

«Un songe – me devrais-je inquiéter d'un songe? –

*Entretient dans mon coeur un chagrin qui le ronge.*

*Je l'évite partout, partout il me poursuit.»*

(«In siemi – pertge ma lascha disturbar d'in siemi? – nutrescha en mes cor in quietad ch'al turmenta. Dapertut guntgescha quel siemi, dapertut ma persequitescha'l.») La psicologia analitica regarda dentant ils siemis sco messadis dal subconscious. Cuntunt il psicolog svizzer Carl Gustav Jung (1875–1961) «als numnava vias roialas encunter il subconscious. El palesava in respect ordvart per lezs e lur messadis sco palentadas d'ina vita interna objectiva (...). Il siemi 'exprima il stadi dal subconscious en in mument determinà» (1). Il psicolog franzos Etienne Perrot ha circumscriu sco suonda la situaziun psichica da l'uman tenor Jung: «Il svilup imposant da la schientscha clera chaschuna per la paja ch'ins na cultivescha betg pli l'olma, l'irraziunal, bandischads sco restanzas dal temp mitologic. L'intelletg che porta la glisch ('luciférien') ha usurpà il plaz dal spiert creativ; quest na duainsa pia betg pli tschertgar sisur, sco ina flomma, mabain en las auas profundas (...). L'anguscha d'oz è in clom



**L'Amorc perencunter sa preschenta sco in muviment cleramain enragischà en l'Europa ed en l'America dal nord, avert a medem temp a las culturas da l'Orient extrem.**

che vegn si dal fund, il sturnizi ch'ins senta sin ils culms spiertals nua ch'ins na sa betg pli sfunsar ragischs en il terratsch che spigenta (...). En noss 20avel tschientaner tardiv van tuttas valurs en muschna; perquai ston adina dapli umans giuven tschertgar il senn da lur vita tras in'aventura interna» (2).

## Ina confraternitad globala

Quai scriveva in interpret da Jung avant 25 onns. Dapi lura n'ha la situaziun betg sa meglierada. L'uman da noss 21avel tschientaner tempriv basegna urgentamain ina colliaziun nova u plitost renovada cun ses subconscious creativ. Quai è vegnì palai dacurt a Losanna cun il referat dal psicolog

Jean-François Prieur, referent uffizial d'in «muviment filosofic global d'iniziaziun tradiziunala» numnà Amorc (3). Lezza sigla fa endament l'amur e munta «Antiquus mysticusque ordo Rosae Crucis» («Uniun veglia e mistica da la Crusch cun rosa»). Il referat ha dà l'ocasiun d'emprer ad enconuscher in ravugl ch'il manual da las religiuns en Svizra menziuna mo passond (4). L'Amorc n'è atgnamain betg ina religiu, mabain ha commembers cristians, giudaics, budistics, islamists euv. Prieur stat en la regiun da Languedoc, sper il cunfin catalan; el ha menziunà che mungias catolicas e schizunt priuras sajan commembras dal muviment. Quest sa definescha ina «confraternitad» averta a «tgi che s'interes-

sa per misticissem, filosofia e spiertalid»; ella «na resguarda ni schlattaina, ni razza, ni religiu, ni classa sociala». Il public dal referat cumpigliava passa ventg persunas, cunzunt glied giuvna u en ils megliers onns; silsunter ha Prieur stuì responder a bleras dumondas. El ha punctuà ch'il patratg central saja da gidar mintga uman a scuvrir ses «magister intern» cun meditar ed elavurar ils agens siemis, sviluppond las facultads da l'atgna olma. Sco ina da las virtids giavischavlas ha'l numnà l'umilitad, citond il pled dal filosof chinai Confucius († 479 a. Cr.): «Co pudess ins reger senza esser umil?»; quai fa endament il pled da Cristus in mez millenni pli tard: «Tgi che vul esser grond tranter vus, ch'el saja voss servitur» (Matteus 20, 26). Il referent ha punctuà ch'i pretendia lavur lunga e perseveranta, senza «guru» e senza ducrina. Decisiva na saja betg la finamira, mabain la via. A la dumonda d'ina giuvna davart la meditaziun ha Prieur respondi che lezza saja vairamain in'uraziun, saja quai in rieu, in laud u in'intercessiu, e ch'ella pretendia da «scuar davent» l'emprim ils quitads da mintga di per pussibilitar a l'olma da sa far valair.

## Occidentala e budistica enina

L'Amorc numna indesch virtids ch'ins duaja pratigar ed ina dudeschavla che resultia da questas, numnadamain: Pazienza, fidanza, moderaziun, toleranza, renunzia («détachement»), generusadad, integritad, umilitad, curaschi, nunviolenza, bainvulientscha e finalmain sabientscha. Questa glista fa endament il budissem; Prieur ha dal reminent cusseglià da leger las ovras da Buda (enturn 500 a. Cr.) e quellas da ses contemporan Confucius. Blera glied, en il vast mund, è

persvasa da l'uscheditga reincarnaziun, pia che l'olma da l'uman, suenter la mort, gija a dar vita ad in auter corp. I na smirvelgia tuttina betg ch'ina partecipanta giuvna dal referat ha fatg a Prieur ina dumonda relativa. Lez ha sa declerà persvas da quella migraziun, damai che l'olma survivia la mort fisica. Quai è er ina cretta centrala dal budissem. En quest senn sumeglia l'Amorc las scolas budistics naschidas en Svizra en ils davos decennis. Ma «ils plis budists sa concentreschan sin l'atgna gruppa e ses cuntegns; i dat strusch contacts tranter ils differents centers» (5). L'Amorc perencunter sa preschenta sco in muviment cleramain enragischà en l'Europa ed en l'America dal nord, avert a medem temp a las culturas da l'Orient extrem. 2005 ha'l edì ina «Decleraziun dals duairs da la persuna», publicada ils 24 da settember 2009 dal magazin «L'Hebdo» (Losanna), p. 77. Ses art. 10 e 13 tunan: «Mintga uman ha il duair da reguardar l'entira carstgaunadad sco sia famiglia e da sa depurtar adina e dapertut sco burgais dal mund (...). Mintga uman ha il duair da respectar e pertgitar la natira, sco giudida en mintga reguard, sco ierta universal a per las generaziuns d'oz e dal futur.»

1) Etienne Perrot, Jung, en: «Encyclopaedia Universalis», tom 10, Paris 1984, p. 715.

2) Etienne Perrot (sco nota 1), p. 716.

3) Adressa: Château d'Omonville, F-27110 Le Tremblay (Normandia auta). Fax: 0033 232 35 66 03.

Posta electronica: amorc@rose-croix.org. Internet: >www.rose-croix.org<

4) Martin Baumann e Jörg Stolz (ed.), Eine Schweiz – viele Religionen. Bielefeld (Transcript, ISBN 978-3-89942-524-6) 2007, pp. 245 e 263.

5) Kerstin-Katja Sindemann en: Martin Baumann e Jörg Stolz (sco nota 4), p. 219.